



Служба преподобному и богоносному отцу нашему и старцу Иосифу Исихасту Афонскому.

НА ВЕЛИЦЕЙ ВЕЧЕРНИ. На Господи возвах, стихиры, глас 5:

От злака Божественнаго воспитанный,/ Иосифе старче, Афонская похвало,/ прелести духов лукавых избегнул,/ на высоту добродетелей ревностию возшед,/дом Духа Святаго сердце свое устроил еси./ Богородицею возлюбленный, монахов правило/ молитвами твоими, преподобне,// управи нас на путь мирен.

Умныя молитвы учителю богомудрый,/ малое воинство духовное собрав/ ко Христу незаблудным путем привел еси,/ души многие в вере утвердил еси,/ памяти Божией непрестанной наставляя,/ к терпению и упованию на Бога призывая,/ Иосифе, горлица пустыннолюбивая,// моли спастися душам нашим.

Священнобезмолвия доброту/ житием своим проповедал еси,/ якоже второе солнце освящая всех и вся,/ исихии образе пречудный,/ монашество истинное на Афоне возродил еси,/ учеников своих дивных во обители вселив,/ цевнице Духа, старче Иосифе// Богородицу моли помилovati нас.

Жестоким житием твоим,/ преподобне старче Иосифе,/ источник умиления нам даровал еси,/ постом безмерным, слезами и потами,/ путь к совершенству во Христе указал еси,/ всех малодушных и немощных/ молитвами твоими укреплял еси./ Ныне в чине великих предстояще Господу Сил,// моли покаяться душам нашим.

Ангельское житие проходя, Иосифе,/ плотская вся духови повинул еси,/ ум владыкою над сердцем поставив,/ нечистых помыслов никакоже принимая,/ прилоги демонския отразил еси,/ славу Божию выну зрел еси,/ темже обрел еси мзду трудов твоих на небесех./ Со всеми святыми, преподобне,// молися о душах наших.

Наста днесь светозарное празднество,/ преподобнаго Иосифа память,/ Исихаста Афонскаго и пещерника,/ ярче солнца просияваго./ Озаряет божественною любовью чтущие его сердца,/ молится мир миру даровати,/ и спастися всем поющим святую память его,/ и животворящую Духа благодать// испрошает у Господа нам.

Кто тебе не ублажит, Иосифе?/ Кто не удивится подвигу твоему?/ Кто не воспоеет терпение постническое?/ Руце свои преподобнии к Богу воздевал еси,/ о страждующих и недугующих молился еси,/ путь к совершенству указал еси./ Мы же грешнии и убогие,/ в страстях присно время свое иждиваемы,/ и нищетою духовною понуждаемы/ просим тя, отче приснопамятне:/ к Отцу Светов принеси// немощные моления наша.

Память твою, отче Иосифе, совершая,/ торжество духа над плотию воспеваем,/ образ воина Христова в тебе зряще,/ смирению и кротости твоим удивляемся:/ како, имея дарований множество,/ ни словом ни помыслом не превозносился еси?/ Дух смиренномудрия и нам гордым испроси// у Подателя всех благ Господа Иисуса.

Слава, глас 3:

От юности званию возлюбльшаго тя Господа/ последовал еси преподобне Иосифе,/ жаждою благодати Божией распалаемый/ на пажити пустынный востекл еси,/ брани вражеския не убоявся мужественне/ постническому житию вдался еси,/ бдениями всенощными и молитвами/ ум Христов стяжал еси,/ подвигом превосходящим естество/ страсти чувственные умертвил еси/ и в обители небесныя водворился еси./ Моли, отче, Подвигоположника нашего// даровати нам велию милость.

И ныне, праздника или Богородичен.

Вход. Прокимен дня. Чтения преподобническая.

На стиховне стихиры, глас 6:

Преподобне отче,/ во всю землю изыде исправление вещаний твоих,/ цвет монашества в пустыне израстил еси,/ и в обители многия насадил еси,/ ангелов собеседниче, богомудрый наставниче,// моли Бога о чадах твоих.

Стих: *Честна пред Господем смерть преподобных Его.*

Преподобне отче,/ память смертную и молитву непрестанную,/ яко богатство некрадомое,/ паче всех сокровищ вожделети научал еси,/ выну имея в уме и на устах:// Господи Иисусе Христе, помилуй нас.

Стих: *Блажен муж бояйся Господа, в заповедех Его восхоцет зело.*

Преподобне отче,/ многоразличныя действия благодати уяснил еси,/ даром утешения страждущих наделен был еси,/ утверждая сердца всех прибегающих к тебе,/ воздвигая от мрака уныния,// темже и о нас, святче, помолися.

Слава, глас тойже:

Монахов множества,/ наставника тя почитаем, старче наш Иосифе,/ любовь Евангельскую ко Господу и ближнему стяжав,/ душу свою о чадах твоих полагал еси,/ о спасении их и научении неустанно пеклся еси,/ законов Божиих усердный исполнитель,/ земный ангеле, небесный человеце, отче преблаженне,/ моли Владычицу нашу Пресвятую Деву Богородицу// светом Христовым просветити нас.

И ныне, праздника или Богородичен.

Тропарь, глас 1:

Пустыни Афонския цвете благоуханный,/ древним единомравный подвижниче,/ пламенный ревнителю молитвы непрестанной,/ благодати истинный послушниче,/ Господа всем сердцем возлюбивый,/ Иосифе преподобне, монахов наставниче,/ моли Христа Бога Спасителя душ наших// от сна лености воздвигнуть нас к покаянию.

НА УТРЕНИ.

По 1-м стихословии седален, глас 5:

Богородицею присно утешаемый,/ в день чеснаго Ея Успения в отечество свое отшел еси,/ от трудов иноческих упокоился еси,/ славою нетленную от Господа Славы увенчався,/ и молишия непрестанно о душах наших.

Слава, и ныне, праздника или Богородичен.

Обновила еси Чистая,/ Божественным рождеством Твоим,/ истлевшее страстьми земнородных мертвенное существо,/ и воздвигла еси вся от смерти к жизни нетления./ Темже тя по долгу блажим все, Дево Препрославленная,/ якоже прорекла еси.

По 2-м стихословии седален, глас 5:

Слезами постническими землю Афонскую орошал еси,/ кровными теченьми Духа Божия приял,/ к преподобным сопричислился и праведным./ Мира мирови испроси, отче Иосифе,/ и помилуватися душам нашим.

Слава, и ныне, праздника или Богородичен.

Настави ны на путь покаяния/ уклоняющихся к злым безпутием,/ и преблагаго прогневаючи Господа,/ Неискусобрачная, Препоблагословенная Марие,/ прибежище отчаянных человеков/ Божие обиталище.

По полиелее седален, глас 1:

Преподобнаго отца нашего Иосифа,/ в последния дни на горе Афонстей явленнаго,/ монашествующим на пути к совершенству и обожению/ божественнаго светильника дивнаго,/ миряном благочестивым солнца духовнаго незаходимаго/ и всем истинно пути Божиего ищущим путевождя,/ триипостаснаго Творца и Бога нашего,/ и заступницу рода человеческого/ Пресвятую Владычицу Богородицу возблагодаривши,/ со умилением сердечным пением/ и песньми духовными почтим.

Слава и ныне праздника или Богородичен.

Помышления нечиста и устна лъстива,/ дела же моя вся оскверненна:/ и что сотворю? како усрящу Судию?/ Владычице Дево, моли Сына Тоего,/ и Зиждителя и Господа,/ яко да в покаянии примет дух мой,/ яко Един Благоутробен.

Степенна 1-й антифон 4-го гласа.

Прокимен: *Честна прел Господем смерть преподобных Его.*

Стих: *Что воздам Господеву о всех, яже воздаде ми? Всякое дыхание:*

Евангелие преподобническое.

По 50-м псалме стихира, глас 6:

Днесь празднует обитель Ватопедская,/ имущи в себе мощи преподобнаго Иосифа,/ радуется земля Арizonская,/ честною главою преподобнаго освящаемая,/ ликует Святая гора Афонская,/ радуются монашествующих собори,/ и все людие христоименитии/ вопиют ко Господу:/ слава Тебе, показавшему нам молитвенника

чуднаго!// Слава Тебе, даровавшему нам предстателя пред Престолом Твоим,/ дерзновенно просящего о душах наших.

Канон преподобнаго, глас 8.

Песнь 1.

***Ирмос:** Воду прошед яко сушу,/ и египетскаго зла избежав,/ израильтянин вопияше:/ Избавителю и Богу нашему поим.*

Слово ми подаждь, Слове Божий, во отвержение недостойных уст моих,/ и очисти сердце мое,/ яко да возмогу по достоянию воспети преподобнаго Твоего.

От юности Христа возжелев, блаженне,/ среди мирскаго мятежа постом и бдением плоть изнурял еси./ Молитвами всенощными непрестанными,/ душу свою предочистил еси.

Плотския страсти умертвив воздержанием,/ совесть имел еси благу,/ око сердечное непрестанно к Богу устремлял еси:/ темже внят молитве твоей, премудре,/ с преподобными сочта тя.

Жилами подвигов твоих духа лености удавил еси,/ бдением трезвенным и молитвою сети диаволи растерзал еси./ Час смертный выну пред очами своими имея,/ на Промысл Божий уповал еси.

Богородичен:

Страсти плоти мояя,/ и ума моего двизания неподобныя утоли,/ молю тя Пречистая Дево,/ и исправь мя заблуждшаго умом.

Песнь 3.

***Ирмос:** Ты еси утверждение,/ притекающих к Тебе Господи,/ Ты еси Свет омраченных,/ и поет Тя дух мой.*

Добраго бисера взыскуя, отче,/ на горе Афонстей пристанище обрел еси,/ землю оную потоами и слезами удобряя/ древо добродетели чудное возрастил еси.

Трудами великими на высоту духовную возшел еси,/ бисер драгоценный Христа в сердце своем имея,/ о чадах своих попечение имел еси/ и о всем мире преподобне.

Весь прилежа Вседержителю,/ всея бесовския злобы избегл еси./ Высотою смирения украшаемь,/ свергл еси на землю велехвальнаго/ изрядными делы твоими.

Умною молитвою сердце до конца очистил еси,/ любовь божественную возгоревся преподобне,/ Господа Иисуса Христа самовидцем соделался еси,/ в терпении Крестом Его укрепляемь.

Богородичен:

В ложесна Твоя воплощаемь Всенепорочная/ вселися Зиждитель,/ на благодеяние верно поющим Тя.

Седален, глас 4:

Преподобне отче Иосифе,/ Господу и Богородице свято послужив,/ от сороколетних пустынных трудов/ в день Успения Пречистой Девы упокоился еси,/ обаче достойных преемников в подвиге из учеников твоих возрастив,/ яко закваску благодатную во обители афонския поместил еси,/ и ими подлинное монашеское жительство на Горе Святей возродив,/ внуки и правнуки своими духовными ныне сию наполняеши,/ и якоже новый победоносный Иисус Навин/ в новую Богом обетованную землю под Небом новым управляеши,/ и нам, недостойным вселения в оную,/ примером твоим и молитвами спастися помози.

Слава и ныне, праздника или богородичен:

Стена непобедимая нам христианом еси Богородице Дево:/ к Тебе бо прибегающе невредами пребываем,/ и паки согрешающе,/ имамы Тя молитвенницу./ Тем благодаряще вопием Ти:/ радуйся Благодатная, Господь с Тобою.

Песнь 4.

Ирмос: Услышах Господи/ смотрения Твоего таинство,/ разумех дела Твоя,/ и прославив Твое Божество.

Сна не дал очима своим/ и веждем своим дремания,/ место Господне обрел еси,/ безмолвия прозябение краснейшее.

Яко елень на источники водныя/ ум твой к Богу устремился еси,/ благодатию Творца изумленный,/ созерцания плод сторичный пожал.

Сердце твое скрижаль очищенну Святаго Духа благодать обретше, отче,/ написа совершенно безстрастие, веру и любовь нелицемерну.

Бог Святыи во святых почиваяй,/ в сердце твоём обитати изволивый,/ богословия духодвижимый орган показал тя, богоносе.

Богородичен:

Нива духовная,/ якоже из бразды клас изнесла еси,/ всю тварь питающего всяческих Бога,/ Приснодево.

Песнь 5.

Ирмос: Утренююще вопием Ти/ Господи, спаси ны:/ Ты бо еси Бог наш,/ разве Тебе иного не вемы.

Высокий умом и житием быв, преподобне,/ к Уму Высочайшему устремился еси./ Пресветлому озарению приобщився,/ горних лучей излияние явился еси.

Любосластные стремления плоти презрев,/ горечь уединения возлюбивше,/ терпением лишений пустынных смирения достигл еси/ и сладости небесных вкусил, преподобне.

Воздержанием крайним украсився,/ образ был еси учеником твоим./ Егда же покаяния сугубого ради в пещере затворился, преподобне,/ ангельского Причастия сподобился еси.

Многоблезненные страсти всегда врачуеши/ приступающих к тебе, отче предивне:/ благодать бо прием от Господа/ недуги душевные исцеляти.

Богородичен:

Исцели недугующего ума моего омрачение,/ Врача рождшая Христа,/ Всенепорочная Владычице.

Песнь 6.

Ирмос: Молитву пролию ко Господу,/ и Тому возведу печали моя:/ яко зол душа моя исполнися,/ и живот мой аду приблизися:/ и молюся яко Иона,/ от тли Боже возведи мя.

В руце возлюбльшаго тя Господа,/ всеконечно вдался, богоносе,/ даров духовных обителище преславное/ и любви Божественныя сосуде предивный явился еси.

Крепостию духа твоего, отче,/ всю силу вражию преобидел еси,/ в терпении величайшем пребывая,/ венец победный приял еси.

Лукавый умертвился змий священными твоими молитвами богоблаженне,/ и от того разрешаются злобы,/ иже помощи от тебе испросившии:/ еси бо угодник Божий всесветел,/ познан был еси верен.

Ученики твои, преподобне,/ яко древа, насажденные при исходищех вод,/ токами живоносными молитв твоих напояемы,/ послушанием яко крины райские процвели.

Богородичен:

Господь с Тобою Пречистая,/ якоже изволил есть, быв Отроковице,/ всех нас от области льстиваго ходатайством Твоим избавил есть:/ темже Тя ныне по долгу/ родове родов ублажаем.

Кондак, глас 8:

Вышняя добродетели Богом наученный,/ образ был еси учеником твоим,/ воздержанию, смирению, наипаче же послушанию тех наставляя,/ и, яко пастырь, стаду своему предходя,/ добре шествовати путем жестоким пустыннаго жития научил еси./ Темже ублажаем тя, Иосифе преподобне,/ моли Христа Бога прощение даровати/ чтущим любовию святую память твою.

Икос:

Избранный Господом Иисусом в подобныя древним ученики,/ из моря мира сего
бушующаго на Гору Святую возшел еси,/ и Девою Богородицею с возлюбленными
чадами Ея вменен,/ Духом Животворящим Святым очистился и осолился еси,/ и
так от тлена греховнаго и пристрастнаго избавлен и свободен,/ братию
смиренномудренную и самоотверженную воспитал еси,/ и деланию молитвенному
непрестанному их обучив,/ даже до смерти телесная твоя/ пощением, бдением и
трезвением о них подвизался еси./ Ныне же о Господе утешаешься,/ со ангелы и
святыми блаженствуеши и слышиши:/ радуйся, Исихасте Великий Иосифе,/
новый афонский пустынниче и монахом наставниче.

Песнь 7.

Ирмос: *От Иудеи дошедше отроцы/ в Вавилоне иногда,/ верою Троическую
пламень пещный попраша,/ поюще: отцев наших Боже благословен еси.*

Пастырь незаблудный овцам словесным в житии твоём, богомудре, был еси./ У
Престола Господня со ангелы предстояще,/ чтущих память твою с любовью ко
пристанищу небесному окорми.

Умом световидным, богоносе, к Царю светов прилепился еси,/ все красное мира
нивочтоже вменил еси,/ Владыце своему Христу подражая, крест на рамо приял
еси,/ и за то власть над страстями и похотями от Него восприял еси,/ и над
демонами, преподобне.

Плотию обложен, отче премудре,/ яко безплотен на земли пожил еси,/ имея
поспешествующую тебе Божию силу,/ на духов злобы поднебесных бесстрашно
ополчался еси.

Прошед подвиги постныя, отче, умом крепким,/ ум прегордый божественным
смирением смирил еси./ Добродетельми множественными украшен,/ плоды
чудесными в духе процвел еси.

Богородичен:

Ново Отроча рождши Пребезначальнаго Слова,/ обетшавшия ны грехом,/
обновила еси Дево,/ и пети укрепила еси:/ отец наших Боже благословен еси.

Песнь 8.

Ирмос: *Богоглаголивши отроцы в пещи,/ со огнем пламень попирающе пояху:/
благословите дела Господня Господа.*

Еже по образу соблюл невредимо,/ ум владыку на страсти пагубныя постнически
поставив,/ и на подобие, якоже мощно, возшел еси.

Невозвратно шествовав, отче премудре и досточудне,/ ведущими к небеси

божественными стезями,/ от зле ведущих до конца благодатию,/ ангельски, отче, уклонился еси.

Ко стяжанию Благодати живоносной всем сущим своим устремлялся, преподобне,/ дерзновение имуще ко Спасу велие,/ бразды сердечныя ученик твоих словом и молитвою напоил еси.

Столп добродетели, постников украшение быв, преподобне,/ всем притекающим к покрову твоему старец богомудрый показался еси,/ изнемогающим утешение подавал еси,/ и врачевание духовное.

Богородичен:

Вода еси неисчерпаемая Дево,/ от неяже вси пиющи благодати исполняемся,/ душою и телом освящаеми.

Песнь 9.

Ирмос: Устрашися всяк слух/ неизреченна Божия снисхождения,/ яко Вышний волею сниде даже и до плоти,/ от девического чрева быв Человек:/ темже Пречистую Богородицу вернии величаем.

Господу и Божией Матери усердствуя поработав,/ на пастбища тучныя блаженств небесных востек,/ в день славного Успения Царицы Небесныя кончины мирныя и непостыдныя сподобился еси.

Во успении своем чад духовных не оставил еси,/ писаньми твоими, яко Духа глаголами, умудряеши./ Наипаче же молитвою у Престола Владычня/ сердца чтущих память твою укрепляеши.

Избранный учениче Богоматери быв, преподобне,/ души яко в зеркале некоем зря яснейше,/ всем вся был еси, старче премирне,/ и по смерти своей не остави любящих тя.

Яко великое солнце нам величием подвиг твоих возсиял еси,/ и озарил еси, богомудре, вся земныя концы,/ прешел еси от света к свету возсиявшему./ Тем вопием ти:/ просвети наша помышления, отче преподобне.

Богородичен:

Просвети Чистая Дево,/ сетующее сердце мое,/ присно преступленми,/ и житейскими многими молвами,/ не остави мене врагом быти в радость,/ яко да славлю Тя,/ и любовьию пою Препетая.

Светилен:

Яко воистинну звезда путеводная явился еси, Иосифе преподобне,/ всем отцам на Горе Святей повизающимся,/ и с ними монахов множеству и воинам в миру побеждающим лукаваго,/ светлостию жития твоего озаряющая стези спасительнаго жительства нам,/ почитающим святую память твою.

Слава, и ныне, праздника или Богородичен:

Тя песньми немолчными ублажаем Дево,/ яко от Троицы Единого родила еси Богородице,/ и носиши на божественную руку Пребогатое Слово/ непременно и неизменно.

На хвалитех стихиры, глас 1.

Преподобных великих отцев,/ отче Иосифе, стопам последовал еси/ и, яко безплотен, во плоти подвигся в трудах,/ образ многим в добродетелех был еси,/ увещал еси человеки преобидети сладкая,/ воздержанием и любомудрием,/ и молитвою к Царству Небесному приблизился еси./ Моли спастися душам нашим.

Якоже ангел на земли пожил еси,/ отче преподобне Иосифе,/ бдением и памятью смертною прилежно помышляюще,/ умную молитву ремеслом соделал еси,/ отцы блаженнейшие ученики своя возвращаху,/ от трудов постнических в мире почил еси./ Моли Человеколюбца Господа Иисуса/ спастися душам нашим.

Премножеством добродетелей твоих, преподобне,/ пустыннолюубцев афонских удивил еси,/ многия под крыле свое, яко птенцы собираяй,/ на пажити созерцаний божественных привел еси,/ целомудрием от Бога восприятым украшенный,/ яко сад красный исполнь суще./ Отче Иосифе приснопрославляемый,/ моли спастися душам нашим.

Слава, глас 6:

Богоносе преблаженне, Иосифе,/ все плотское мудрование духу повинул еси,/ пощения страданьми утвердився,/ яко злато в горниле искушено сияя явився,/ приятелище был еси Духа Пресвятаго,/ собрав монашествующих множества,/ и учении твоими, яко некою лестницею восходную на небо,/ на высоту добродетелей возвел еси./ Поминай нас чтущих память твою присно священную,/ и моли спастися душам нашим.

И ныне, Богородичен:

Владычице, прими молитву раб Твоих,/ и избави нас/ от всякия нужды и печали.

Славословие великое. И отпуст.

На Литургии служба вся преподобническая.

†††